

आकाशवाणी

पैहले खास-खास खबरां:-

1. भारत ते आस्ट्रेलिया नै रक्षा ते सुरक्षा सहयोग गी होर व्यापक ते बदाने आस्तै सांझा रक्षा ते सुरक्षा सहयोग बारे सांझा घोषणा पत्र जारी कीता ऐ।
2. प्रधानमंत्री नरेन्द्र मोदी होर अज्ज न्यूजीलैंड दे 2 दिन दे दौरे तैहत Auckland पुजडन।
3. केन्द्रीय गृहमंत्री अमित शाह होरें आखेआ जे सुरक्षित बन्ने, समृद्ध सीमा क्षेत्र ते सौहार्दा-सर्तक समाज रल्लिए मुख्य गी सुरक्षित बनाई सकदे न।
4. महाराष्ट्र दे मुख्यमंत्री देवेन्द्र फडणवीस होरें राज्य आस्तै इक बरोबर नागरिक संहिता दा मसोदा तयार करने लेई 7 सदस्यीय समीति दे गठन दी घोषणा कीती ऐ।
5. ईरान दे साबका सर्वोच्चय नेता अयातुल्ला अली खामेनई हुंदे खीरी रस्मोआत मशहद दे इमाम रजा मजार च अदा कीते गे।
6. फीफा विश्व कप च फ्रांस नै मरोको गी 2-0 कन्नै हराइयै सैमीफाईनल च थाहर बनाई।
7. हरमनप्रीत कौर दी अगुआई आहली भारतीय महिला क्रिकेट टीम लंदन दे लॉडंस मैदान पर मेजबान इंग्लैंड कन्नै इक रोजा टेस्ट मैच खेडोग।

<><><><><><>

India Australia Joint Declaration

भारत ते आस्ट्रेलिया नै रक्षा ते सुरक्षा सहयोग गी होर बदाने आस्तै सांझा रक्षा ते सुरक्षा सहयोग बारे संयुक्त घोषणा पत्र जारी कीता ऐ। एदे तैहत हिंद प्रशांत क्षेत्र च

सांझा हितें गी प्रभावित करने आहले रक्षा घटनाक्रमें पर नियमित परामर्श कीता जाग। इस बारे दस्तख्त प्रतिनिधिमंडल स्तह दी गल्लबात मगरा होए। त्रिएं भारत आस्ट्रेलिया सालाना शिखर सम्मेलन दौरान दौनें नेताएं भारत गी आस्ट्रेलियाई यूरेनियम दी लम्मे चिरे तगर आपूर्ति बवस्था गी खीरी रुप दिता। एदे तैहत भारत दे स्वच्छ ऊर्जा कार्यक्रम गी मज़बूती थहोग ते सिफर कार्बन उत्सर्जन दा लक्ष्य हासिल करने दे जतनें गी बल थहोग। मीडिया गी सम्बोधित करदे होई विदेश सचिव विक्रम मिश्री होरें आखेआ जे प्रधानमंत्री मोदी ते आस्ट्रेलिया दे प्रधानमंत्री एंथनी अल्बनीज हुंदे बशकार होई दी गल्लबात दौनें नेताएं बशकार बददी रणनीतिक सांझेदारी ते आपसी समझ दी झलक दस्सदी ऐ।

<><><><><><>

PM New Zealand

प्रधानमंत्री नरेन्द्र मोदी होर अज्ज न्यूजीलैंड दे 2 दिन दे दौरे तैहत Auckland पुजडन। त्रै मुखे दे उन्दे दौरे दा एह खीरी पड़ाव ऐ। करीब 4 दहाके दे लम्मे वक्फे मगरा कुसै भारतीय प्रधानमंत्री दी एह पैहली न्यूजीलैंड दी यात्रा होग। प्रधानमंत्री होर न्यूजीलैंड पुजने पर अपने हमरुतबा हुंदे कन्नै गल्लबात करडन। दवै नेता दपक्खी रिश्ते दी समीक्षा करडन, जिंदे च पिच्छले 2 बरे च खासी प्रगति होई ऐ खास करी बपार, कारोबार ते रक्षा आहले क्षेत्र च । प्रधानमंत्री होर उत्थे मन्ने-परमन्ने दे कारोबारिएं ते खेड्ड शख्सियतें कन्नै बी मलाटी करडन। न्यूजीलैंड च भारतीय समुदाय दे कन्नै उत्थे दे नागरिकें च बी इस ऐतिहासिक मौके गी लेई खासी उत्सुकता ऐ। प्रधानमंत्री होर उत्थे रवा'रदे भारतीयें गी बी सम्बोधित करडन।

<><><><><><>

PM Melbourne

प्रधानमंत्री नरेन्द्र मोदी हुंदी आस्ट्रेलिया दी आधिकारिक यात्रा अपने खीरले पड़ाव पर ऐ। त्रै मुख्यें दी इस यात्रा च अगली थाहर लेई रवाना होने थमां पैहले अज्ज मेलबर्न च मोदी हुंदे कैई महत्वपूर्ण कार्यक्रम तय न। साहड़े संवाददाता नै दस्सेआ ऐ जे मोदी होर अज्ज विपक्ष दे नेता एंगस टेलर हुंदे कन्नै मलाटी करडन। इस दौरान दौने नेताएं बश्कार दपकखी सरबंधें ते राजनीतिक सहयोग गी मज़बूत करने पर व्यापक चर्चा होग।

<><><><><><>

HM Border Districts

केन्द्री गृहमंत्री अमित शाह होरें आखेआ ऐ जे सुरक्षत सीमा, समृद्ध सीमा क्षेत्र ते सर्तक समाज रलियै मुख्य गी सुरक्षत बनाई सकदे न। गृहमंत्री होरें एह गल्ल नमीं दिल्ली च बन्ने आहले जिलें दे पुलस अधीक्षकें दे सम्मेलन गी सम्बोधित करदे होई आखी। श्री शाह होरें आखेआ जे सरकार मुल्खा गी पूरी चाल्ली घुसपैठ मुक्त बनाने लेई इक मजबूत प्रणाली बना रदी ऐ। उ'नें दस्सेआ जे नरेन्द्र मोदी सरकार नै वैज्ञानिक तौरा उप्पर बन्ने आहले बुनियादी ढांचे च चार सौ फीसदी बढ़ोतरी कीती ऐ।

Vibrant Village Programme दा जिक्र करदे होई गृहमंत्री होरें आखेआ जे इस पैहलकदमी तैहत पलायन गी रोकने, रोजगार पैदा करने ते सरकारी कल्याणकारी योजनाएं गी सौ फीसदी लागू करने लेई पूरे जतन कीते जा'रदे न।

<><><><><><>

MAHA -UCC Committee

महाराष्ट्र दे मुखमंत्री देवेन्द्र फडणवीस होरें राज्य आस्तै इक बरोबर नागरिक संहिता दा मसौदा तयार करने आस्तै सुप्रीम कोर्ट दी रटैर न्यायाधीश रंजना देसाई हुंदी अध्यक्षता च 7 सदस्यीय समीति दे गठन दी घोषणा कीती ऐ। उ'नें महाराष्ट्र विधान सभा च कल एह घोषणा कीती। मुखमंत्री होरें आखेआ जे भारत दे संविधान च निहित राज्य नीति दे निर्देशक सिद्धांतें मूजब हर राज्य गी इक बरोबर नागरिक संहिता लागू करने पर विचार करना लोड़चदा। उ'नें आखेआ जे इस्सै प्रावधान मुजब राज्य सरकार नै 2026 दे बजट सत्र दौरान इक बरोबर नागरिक संहिता गी लागू करने आस्तै इक समीति कायम करने दी घोषणा कीती ही। एह समीति अगले 6 महीने दे अंदर राज्य सरकार गी अपनी रिपोर्ट सौंपोग। इस रिपोर्ट दे आधार पर सरकार औंदे स्यालै आहले इजलास च नागपुर च विधानसभा दे दौनें सदनें दे सामने इस विधेयक गी पेश करने पर विचार करा रदी ऐ।

<><><><><><>

Khamenei Funeral

ईरान दे साबका सर्वोच्च नेता आयातोल्लाह अली खामेनी दा अंतिम संस्कार मशहद दे इमाम रेज़ा मज़ार च कीता गेआ। ज़हारां बद्दे लोक उनें'गी खीरी विदाई देने लेई इकट्ठे होई गे हे। उन्दे बड़्डे पुतर सेय्यद मोजतबा खमेनी होरें नमाज़ें जनाज़ा पढ़ी। आयातोल्लाह अली खामेनी इस बरे 28 फरवरी गी अमरीका-इजराइल हमलें च मारे गे हे, जेहदे कन्नै पूरे पच्छमी एशिया खेतर च व्यापक टाकरा शुरु होई गेआ हा।

<><><><><><>

Puri E-85 Fuel Price

पैट्रोलियम ते कुदरती गैस मंत्री हरदीप सिंह पुरी होरें आखेआ ऐ जे सरकार E-85 ईंधन आनने दी योजना बना रदी ऐ जेड़ा मानक ई-20 पैट्रल थमां करीब 20 रपे फीह लीटर स्हाबै सस्ता होग। उ'नें आखेआ जे E-85 छड़ा उ'नें गड़डियें लेई उपलब्ध होग जेड़ियां खास तौर पर इस ईंधन दे इस्तेमाल लेई डिजाईन कीतियां गेदियां न। इक निजी समाचार चैनल गी दिते गेदे Interview च पैट्रोलियम मंत्री होरें आखेआ जे प्रस्तावित गैस दा मकसद उपभोक्ताएं गी आर्थिक राहत प्रदान करना ते कन्नै गै सरकार दे इथेनॉल मिश्रण कार्यक्रम गी अगगे बदाना ऐ।

<><><><><><><><>

BJP RS Polls

BJP नै पच्छिम बंगाल च राज्यसभा उप-चुनां लेई Sukendu Shekhar Roy, Sushmita Dev ते Prakash Chik Baraik दे नांस मेदवारें दे तौरा पर घोषित कीते न। इनें सीटें पर उप-चुनांस इस महीने दी 24 तरीक गी होडन। त्रैवे नेताएं हाल च गै अखिल भारती त्रिमूल कांग्रेस छोड़ियै BJP च शामिल होए हे।

<><><><><><><><>

FIFA World Cup

FIFA विश्व कप च फ्रांस नै अमरीका दे बोस्टन च पैहले क्वार्टर फाईनल च Morocco गी 2-0 कन्नै हराईयै सैमीफाईनल च दाखल होई गेआ। Half Time च टीमें कोई गोल नीं कीता, लेकन फ्रांस ने दुए Half च 60में मिन्ट च गोल कीता। एह गोल Kylian

Mbappe होरें कीता ते इसै च बाददा करदे होई 66में मिन्ट च Ousmane Dembele होरें बी गोल करी दिता।

<><><><><><>

Test Cricket India Vs England

हरमनप्रीत कौर दी अगुआई च भारतीय महिला क्रिकेट टीम अज्ज लंदन च लॉर्ड्स मैदान च मेजबान इंग्लैंड कन्नै ऐतिहासिक इक रोजा टेस्ट मैच खेड्ढोग। मैच भारतीय समें मूजब दपैहरी साड्डे त्रै बजे थमां खेडेया जाहग। एह पैहली बारी ऐ जिसले लार्ड्स मैदान पर महिला टेस्ट मैच खेड्ढेया जाहग। इस 4 रोजा टेस्ट मैच आस्तै रिकार्ड जहार थमां मते लोक पैहले गै अपनी सीट बुक करी लैती दी ऐ।

भारत ते इंग्लैंड दी महिला क्रिकेट टीम इस बारी 16में टेस्ट मैच च इक दुए दा सामना करडन। इंदे चा इंग्लैंड नै अजे तगर इक जिसलै कि भारत नै त्रै मैच जिते न। बाकी 11 ड्रा रए।

<><><><><><>

T-20 Cricket

ब्रिस्टल च मेजबान इंग्लैंड कन्नै चौथे टी-20 अंतराष्ट्रीय क्रिकेट मैच च कल रातीं भारत गी 9 विकट कन्नै करारी हार दा सामना करना पेया। इंग्लैंड नै 3-0 कन्नै अजय बढ़त बनाइयै 5 मैचें दी श्रृंखला पर कब्जा करी लैता ऐ। टी-20 श्रृंखला च एह भारतीय टीम दी लगातार दुई हार ऐ। टॉस जितिए पैहले बल्लेबाजी करदे होई भारत नै

तय 20 ओवर च 7 विकट पर 158 रन्ज बनाए। परते च इंग्लैंड नै 14 ओवर च गै छड़ा इक विकट मुहाड़यै लक्ष्य हासिल करी लैता। दवै टीमां कल साउथेम्प्टन च श्रृंखला दा 5मां ते खीरला मैच खेड़ढगंन।

<><><><><><>

IMD-Weather

मौसम विभाग नै उत्तराखंड च अज्ज मौलेधार बरखा पौने दी चेतावनी जारी कीती ऐ। अरुणाचल प्रदेश, असम, मेघालय, सिक्किम, पश्चिम बंगाल दे तराई आहले क्षेत्रें ते उत्तर-प्रदेश दे किश हिस्सें च बी अज्ज मौलाधार बरखा दा अनुमान ऐ। अगले 3-4 दिने च दिल्ली, हरियाणा, चंडीगढ़, हिमाचल प्रदेश, बिहार, पूर्वी मध्य प्रदेश ते मध्य महाराष्ट्र च तेज बरखा दे आसार न। कर्नाटक, केरलम, माहे, नागालैंड, मणिपुर, मिजोरम, त्रिपुरा, तमिलनाडू, पुदुचेरी ते कराईकल च बी ऐसी गै स्थिति रौहने दी संभावना ऐ। तोंआई राश्ट्रीय राजधानी दे केंई इलाकें च अज्ज बड़डलै थमां हलकी थमां दरमेयानें दर्जे दी बरखा होआ रदी ऐ।

<><><><><><>